



PV Sindhu Japan Open 2026 Final-i iogo

Israel army-i southern Lebanon nung school asem raksatsü: minister

VOL. XXIII ISSUE NO. 276 (ADOK 276) DIMAPUR AMUNGNÜ (SUNDAY) CHITENI (JULY) 19, 2026

₹ 5.00

NPF-i Nagaland nung tim masüba inyaker: NPP

Dimapur, July 18, 2026 (TYO): Naga People's Front (NPF)-i Nagaland nung National People's Party (NPP) züngsemtem mesüzüker aser tim masüba inyakyim agi party melendaktsür ta NPP-i tai tongloktüsügo.

"Tawa Kohima nung NPP municipal councilor ana NPF nung denogo aser kasa inyakyimji Dimapur nunga

councilor anati inyaka liasü. Iba ya asaa sentong atonger inyakba ka lir" ta National Working President James K. Sangma-i sangdong ka nung ashi.

Democratic politics ya tanga party tem tashi mait kümdaktsüba ajanga masü saka tangatetba, public tenzükbä aser nübortemi shimtetba ajanga len anitsüla ta paisa ashi.

ECI-i mezüngbuba All India Media Conference 2026 ayonga mungogo

Delhi, 18th July 2026 (TYO): Democracy yimsü benshiba India ama linük ka nung press/media ji tongti tongshi mesor rongnung ka lir, anungji, yangi nenok teinyaktsü shilem tulu lir. Iba o ya 17th July, 2026 nü Chief Election Commissioner of India, Gyanesh Kumar-i ECI-i osangbenertem atema ayongba mungdang ka IIIDEM, Dwarka, New Delhi nung akadang metetdaktsü. Iba mungdang nung India union kübok aliba state 28 den Union Territory 8 nungi osangbener 350 dak tali adenshia liasü.

"India nung election ya linük temzüng aser election temzüng nung kechi lir, iba amaji dang agir", ta pai jangashitsü. India rangben nung voters ya 95 crore shi lir, saka voter-ji tejangiabo magütsütettsü kechiyong voter-ji kümshi noklang nung 8% shi renloker, ta pai ashi.

Tawa-tanü ECI-i tenzükbä "ECINET App" ya kanga tongtibang lir, kechiyong iba App nung ya election dak sentakba osangtsüsang aser temetettsü ajak shia angutsü aser mangatetba lira, ibajia asüngdanga jangjatsü akoker. Iba App ya tenzüker talangkabo masü saka Twitter (X) amshir dang nungi teimba küma odaki, ta CEC-isa shisem. Paisa iba App download süa yangji aliba maongka agitsü mepishia metetdaktsü.

Alima nung indang-indanga (transparent süa) agiba election inyakyim tajungtiba rongnung India ya ka ta alimai züngshir, iyongji tanga linük shirnoki parliamentary election benshir, parnoki arua India nung election agiba yimya angazüker aor, ta pai kuli kar dena metetdaktsü.

Tang Special Intensive Revision (SIR) agir külen ya - Bihar, Kerala, Tamil Naidu, Pondicherry, West Bengal election kanga takok ngua agiogo aser West Bengal election nungbo noklang shilem nung 93.7% liasü, aser ibaji parliamentary election agiba lima nungbo voters-temi shilem agiba rongnung tematiba lira ser ibai India asoshi tapak tasen ka asütsü, ta paisa takok anguba osang ka lemsatép.

Press/media ya democracy yimsü benshir atema tongti nükmen (forth pillar) ka lir, iyongji osangbenertemi election inyakyim metettsübaji kanga tongtibang aser ECI nükjidong balala grass root tashi lua angazüksü atemaji press/media shilem aser khuret tulu lir, ta angateta iba mungdang ya ayongzükogo aser ibai kümshi ayongtsü tebilemba lir, ta paisa metetdaktsügo.

CEC Gyanesh dang "One Nation, One Election" dak sentakba nung tasüngdanga ka osangbener kari asüngdangdang, "one nation, one election indang ya Indian Temzüng nung kecha shia mali, anungji, ni linük temzüng nung maliba indangbo kecha melangzütsü", ta ashi. Iba den ano State aser Union Territory balala nungi arur osangbenertemi pei state/UT nung atalokba balala indang mangatetba onüktem asüngdanga sensaksem tajung liasü.

Iba sentong nung IIIDEM DG (Media) Ashish Goyal, IIIDEM DG Rakesh Kumar Verma, DG (IT) Dr. Seema Khanna, DDG (Law) Vijay Kumar Pandey, DD (Media) Apurva Kumar Singh parnoki onük balala nung ajemdaker osangzülurtemi osang züluba/agütsüba mapang kümdanga aser meteta alitsü onük tajung aika bener arua lemsatép.

Iba mungdang ya "connecting stakeholders, strengthening democracy: The role of media in elections" omen dak rangkoker India nung electoral inyakyim tashi itta bener aotsü aser nüburtem nem osangtsüsang shitak agütsüdaktsütsü nükjidong nung ayongba lir.

Nagaland nungi item osangbenertem or aden - H Anguvi Chishi (Morung Express), Sashimeren (Tir Yimym), Bendangchuba (Nagaland Post), Livine Khrozoh (Eastern Mirror), Sentinungla Imchen (DDK), Asonuo (Akashvani Kohima), aser Peidodibe Herie (Hornbill TV) parnok tenet liasü. Iba den ano DIPR Nagaland nungi Akummeren aser Chief Electoral Office Nagaland nungi Seroba Sangtam na liasü.

CNTC-i CM Rio dang oil exploration atema teinyaktsütem lemsateper

Dimapur, July 18, 2026 (TYO): Central Nagaland Tribal Council (CNTC)-i Disputed Area Belt (DAB) nung oil exploration maparen atema Chief Minister Dr. Neiphiu Rio dang teinyaktsü kar metetdaktsügo.

Nagaland sorkari state nung petroleum exploration tenzüksü lemtetba pelashishia agizüker ajisüaka kasa mapang nung iba maparen ya Nagaland nung lisopurtem temetentem aser taginübatem kümzüka ayutsüsa ozüngi melaba ama, tashishitsü melii aser asüngdangtepa inyaksüla ta CNTC-i CMDr. Rio dang ashi.

CNTC-isa sorkar dang Disputed Area Belt (DAB) nung oil exploration asütsüba tesem jungjunga jangjatsüla aser lateta

ayutsüla ta metetdaktsügo.

Parnokisa sorkar dang oil exploration mesüra drilling maparen metenzükdang sendaktepa alir ajak jatepa külem senden ka amentsü mepishiogo.

Iba senden nung kongshia aliba ali kiburtem, Village Councils, Kin Hoho tem, Civil Society Organizations (CSOs), public lennirtem, mongintem aser sendaktepa alir ajak adentsüla ta CNTC-i ashi.

CNTC-isa sorkar dang Nagaland nung Oil Refinery ka amenoktsü ayongzükogo. Nagaland nung oil refinery ka danga amenokba ajanga Nagaland nung alirtem nem mapa agütsütsü aser industrialization tenzüksü ta parnokisa ashi.

Iba onük timi tangatetep kati maru tashi Assam sorkari DAB nung drilling aser oil exploration maparen inyakba anendaktsütsü atema Nagaland sorkar dang mepishir ta CNTC-isa metetdaktsügo.

Disputed Area Belt (DAB) nung tesem junga jangjatepa ladangba den statutory approvals aser legal requirements maparen metembang tashi oil exploration aser drilling maparen ajak anena atatsüla. Maneni environmental laws aser standards den putepa oil exploration aser drilling maparen inyaka aotsü onoki ayongzüker ta CNTC President Huklye Yepthomi aser General Secretary Akum Pongen nati CM Rio dangi züluba shidi nungsa shiogo.

FNTA atema special Assembly session ka amentsü

Kohima, July 18, 2026 (TYO): Nagaland sorkari Frontier Nagaland Territorial Authority (FNTA) onük asoshi State Assembly special session ka jazüksü renemer.

Centre sorkari autonomous body nem legislative powers agütsütsü tebilemba asadangtsü atema mapang talila meshilokba sülen sorkari special session jazüka amentsü.

"State Cabinet-i iba onük atema jembiogo aser Chief Minister Neiphiu Rio den Cabinet züngsemtem den tongti ketdangsürtemi tawa tu Union Home Minister Amit Shah den ajurutepa FNTA nem legislative powers agütsütsü rongshiogo" ta Deputy Chief Minister Y. Patton-i ashi.

Ministry of Home Affairs (MHA)-i tatembang lemtet ka magidang iba tebilemba

asadangtsü atema hopta ka mesüra ana meshiloka liasü ta Y Patton-isa ashi.

Centre, Nagaland sorkar aser ENPO tsüngda February 5, 2026 nü Memorandum of Agreement (MoA) sign sütepba ama mapa tenzükanag ta Eastern Nagaland People's Organisation (ENPO)-i rongshiba mapang ka state sorkari special session ka jazüka amentsü lemtet agiogo.

JMF-i Ao oshi nung alakteta takok angur tushi



JMF-i Ao oshi nung alakteta takok angur tushiba sentong senpet agizükertem aser sentong nung shilem agirtem külemi tangokba noksa angur.

Mokokchung, Chiteni/July 18 (TYO) : Jemtimenba Mollier Foundation-i(JMF) tanü Ao oshi nung alakteta takok angurtem tushiba sentong ka Sangtemla Ward Multipurpose Hall Mokokchung nung kaogo.

Jemtimenba Mollier Foundation ajanga küm 12 tashi Ao oshi takok balala ngutetertem nem senpet agüja arura ser taküm Kr.Imnokila Mollier lai HSLC-2026 tatidang Ao Subject nung 97 marks anguba, Kr.Sungjemtula lai HSSLC-2026 tatidang Ao Subject nung marks 96 anguba, Sb.Kilangnükshi

Arangtet Tatidang Diploma Tenren-2026 tati nung Marks 66.3% anguba, Kr.Alsenla Ozüküm Arangtet Tatidang Post Graduate Diploma Tenren nung Marks 81.1% anguba aser Kr.Temjenmenla Pongen lai Nagaland university Tatidang-2026 agiba nung Fazl Ali College nungi Ao Subject nung 82.5% ngutetba asoshi parnok nem JMF-i sen den kuli kaket agüja tushia liasü.

Sentong nung Tsüngremer lenisüba jazüka Mokokchung Baptist Arogo Pastor Rev.Imtimenpang ajanga

sarasadem aser JMF Mendenbuba ajanga tarur pela agizüka jembi aser sentong meraketsür Wb.I.Zülü Imsong Chairman, Chuchuyimpang Village Council ajanga tayongzükba o jembi. Lenjeter telok ajanga ken tajung ka tena telok ajungmeso aser JMF Züngsem Dr.P.Tiatemsü Mollier-i ketdangsüa takok angurtem nem senpet agutsüba den MTBA Pastor(W0 Wt.Shilula Imchen-i tenüngsang agüja sarasadema sentong shibangba den Kr.Asapokla ketdangsüba nung sentong takok ngua achaayanga agi.

ALTC-i Skill Development Symposium & Seminar ayongzüka agi



Dimapur, Chiteni/July 18 (TYO): Ao Lanur Telongjem Chumoukedima-i ayongzüka Mount Mary College, Chümoukedima nung Skill Development Symposium & Seminar ka agiogo, kong kaketshirtem, lanur entrepreneurs aser wadang balala nungi nüburtemi shilem agia liasü.

Sentong ya Bendang Imsong-i sarasademer tenzük aser iba sülen ALTC tir Talisunep Walling-i lokti pela agizükba o jembiba liasü. ALTC Advisor, Suwa Lkr-i symposium indang nükjidong metetdakja liasü.

Iba sentong ya technical session asem küma lemsar agia liasü. Bambusa Express and JOME Foods Pvt. Ltd.

ngutetsang aser CEO Medoneizo Putsure-i, Digital Business onük nung ajemdaker jembi, aser innovation aser entrepreneurship nung shilem agitsü ajungmesoa liasü.

Assistant General Manager, Nagaland Tool Room & Training Centre, Er. Imnayangner Imchen-i, Industry 4.0 aser Al-based programme tem densema technical aser vocational training dak sendakba nung maongka balala indang tangazükba agüja liasü.

Kasa mapang nung Business Association of Nagas Financial Advisor aser Consultant to Nagaland State Co-operative Bank Ltd I. Sashi Pongener-i, Financial Management aser Self-Employment dak sendakba nung shisatsü balala agütsü.

Session ajak ya tasüngdangba balala asüngdanga telangzüba agütsüba sülen tembang aser iba ajanga sentong nung shilem agirtem nem ken o mejangjabatem jangja jangja angazüktsü asoshi maongka agütsüogo.

ALTC-i shisalen sayurtem, Mount Mary College, volunteer aser sentong nung shilem agir ajak dang iba sentong takok asoshi teyari tulu agütsüba atema kanga pelaba lemsatepogo. ALTC ya skill development, entrepreneurship ajungkettsü aser iba amala mesükba sentongtem ayongzüka lanurtem nem tashi tali agütsütsü bendanga agütsür lir, ta kasa sangdong ajanga metetdaktsü.

Kohima nung Bystander Debate tetoktepba ayongzüka agi

Kohima, Chiteni/July 18 (TYO): Project Empathy kübok Assam Rifles-i Sentong nung Maj Gen H ayongzüka Classes VI nungi S Mavi, Inspector General X tsüingda aliba kaketshirtem Assam Rifles (North) tongti atema Bystander Debate Competition ka ayongzüka Competition ka ayongzüka katsüogo.

Iba tetoktepba ya July 18 nü Assam Rifles Public School (ARPS), Kohima nung agia liasü. Sentong ya "Bystander See It. Think It. Speak It. Change It" omen nung ajemdaker agi.

School nung kaketshirtem kati ka yongtsü nung me z ü n g m e s h i t e p b a, mesenmetui amshiba mesüra tanga tayongzükba balala kokteta aotsü asoshi aria bilemteptsü, tasü aittsü aser khuret angateta teyongtsüi aier kaka akümtsü atema koda tongtibang iba indang kaketshirtem nem angatetdaktsütsü nükjidong nung iba sentong ayongzükogo.

Iba tetoktepba ajanga shilem agirtemi, teküzmükba kübok shinga mesentokba lokti ka yangertsü atema bystander tem indang shilem ya koda tongtibang iba dak sendakba nung pei tebilembatem lemsatepa liasü, aser iba ajanga yangertsü atema khuret ochimashi inyakyim anema angatetba sensotem anitettsü ola adoktsü koda tongtibang meranger.

Iba tetoktepba ajanga kaketshirtem nem parnok tebilemba lemsateptsü, lokti nung o jembiba sempet arangtetshitsü aser lokti nung khuret angatetba nübu kaka asütsü kodang tongtibang iba ya angatettsü asoshi sabang tajung ka agütsüogo.

Project Empathy ajanga Assam Rifles-i lanurtem ajungketba dang masü saka lokti nem shilem agidaktsür aser tarutsü tajung ka yangertsü atema khuret angatetba sensotem anitettsü meranger.

Assam Rifles-i sentong balala ayongzüka agi



Dimapur, Chiteni/July 18 (Agencies): Assam Rifles-i, sepai kibongtem atema Jalukie nung July 17 nü special 'Rubaru' session ka ayongzüka katsüogo. Iba sentong ya "Creative Minds, Compassionate Hearts" (Shabdon ka Sparsh - Jo Chot Bhi Dein Aur Marham Bhi Bane) omen nung ajemdaker agia liasü.

Sentong nungsa sensaksem mapang ka Dr Vandini Setia-i ayongzüka agi, koba kibongtemi ola madoki aremzüka nongita yariba ya mangu ama meyutsütsüba dak rangloker agia liasü.

Sensaksem mapang tongtepratep ajanga koda tetsükdaktsü balala kokteta aotsü asoshi kibongtem nem teyari agütsür iba indang sensak asem, kechiyong sepaitem aser

kibong mapang talanglang pilar alitsüsa akümer.

Sentong tajung ayongzüka katsüba atema kibongtemi Assam Rifles dang kanga pelaba lemsatepa liasü. Maneni iba sentong ajanga sepaitem lenla ajak nung terenlok asoshi Assam Rifles' bendanga agütsür aliba sayur.

Kasa mapang nung Assam Rifles-i, Subedar K B Chhetri, Kirti Chakra (NIEDO) Centre of Excellence, Ghaspani nungi kaketshir 25 Cherrapunjee aser Shillong nati Educational Exposure Tour ka anirogo.

Kaketshirtem nem tajangshiba balala agüja parnok mangdang ulushidaktsütsü nükjidong nung iba sentong ayongzüka agiogo.

Tour mapang kaketshirtemi nungtugu educational institution

aser alinük tongtibangtem semdang aser iba ajanga Meghalaya indang tzi-mopung, puti otsü aser sobaliba indang tangazükba agütsüogo.

Maneni tour mapang kaketshirtemi 'Lt Gen Vikas Lakhera, AVSM, SM, Director General Assam Rifles den sensaksema liasü, shibai kaketshirtem temaba jenjang tongtettsü atema bendanga agüja inyakttsü ajungshia liasü. Paisa, parnok dang nükjidong tulu ayutsü aser khuret angatetba senso tajung kaka akümtsü ajungshia liasü.

Iba amala inyakyim ajanga Assam Rifles-i lanurtem nem maneni tashi agüja arudar, koba shisaluyim, lokti terenlok aser linük yangertsü atema AR bendanga agütsür aliba nung shilem ka lir.

NSLSA kübok Special Lok Adalat ka ayongzüka agiogo



Kohima, Chiteni/July 18 (TYO): National Legal Services Authority (NALSA) tetuyuba nung District Legal Services Authorities (DLSAs)-i ayongzüka July 18 nü Nagaland kübok tesem balala nung Negotiable Instrument (NI) Cases ken o dak sendakba nung Special Lok Adalat ka agiogo.

Ajak senteper bangdaka aliba NI Act cases 22 angadang aser ken o pongu bentettsüogo. Settlement amount ajak agi sen 58,58,800 liasü.

Kiphire DLSA-i ken o timba bentettsüba mangaoka lir. Ken o asem benok aser asemprongla bentettsüogo. Ken o asem atema settlement

amount ji 51,08,800 liasü.

Dimapur DLSA-i ken o tenet benokba ka settlement amount 4,00,000 agi bentettsüogo, aser Peren DLSA-ia ken o ka benokba settlement amount 3,50,000 agi bentettsüogo.

Kohima DLSA nung NI Act case ti benok saka ka danga mebentettet aser item ken o tem ya okadaki abentsü tuyuogo. Kasaji Mokokchung DLSA aser Zunheboto DLSA natia ken o benokbatem mebentettsü aser okadaki abentsü tuyua liasü.

Special Lok Adalat ajanga, Negotiable Instruments Act kübok mangatettep alibatem bentettsü asoshi sabang tajung ka agütsür.



BILEMTETTER

"Kechiaser ni asoshi taküm alibaji Khrista, aser tasütsüji tajangzük lir."

~ Filipi 1:21

NUNGSANGJENLA
17.8.1937 ~ 20.7.2022

IMYANGERBA
22.9.1933 ~ 19.7.2025

Kodanga amadoktsü makokoba tsürapur iba akümüli wadang toktsür kibuba dangi ogo, aji süaka par temeim mapatem onok molungjang nung teti mepilai lir.

Temeim chirnur.



July 18, 2026 nü Sriarikota nung aliba Satish Dhawan Space Centre nungi Vikram-1 Test Flight-1 (Mission Aagaman) khakettsüdang tangokba noksa nung angur. Iba ya India nunger mezüngbuba private orbital rocket lir.

CJP tentetsang, Abhijit Dipke-i lumia longkak ait tenzük

New Delhi, July 18

(Agencies): Honibarnep Delhi police-i Sonam Wangchuk hospital-i anir aoba sülen mapang tatsüka tsüingda Cockroach Janta Party (CJP) tentetsang, Abhijit Dipke-i, pai mapang telatet makai lumia longkak ait tenzük, ta metetdaksü.

Dipke-i X ajanga, "Tang nungi tenzüka ni mapang kecha telatet makai lumia longkak ait tenzük," ta metetdaksü.

Honibarnü Jantar Mantar nung Dipke-i longkak aiterem den tejembidak mapang nung tetsür kati pa dak sentsü aketba tzü shiloktsüba nungi mangatetep adoka liasü.

CJP pusema June 28 anogo nungi Wangchuk den All India Students' Association (AISA) nungi züngsem aseme longkak ait tenzüka liasü.

AISA züngsem asem- Neha, Aameen aser Manish nungerbo tang tashi Jantar Mantar nungji lumia longkak aidtar.

Delhi Police-i Wangchuk

kangshia hospital-i anir aoba aija Aam Aadmi Party (AAP)-i, iba ya police-i longkak aiterem dak tashiyim amshiba lir, ta aitsü.

Rajya Sabha MP Sanjay Singh-i, Wangchuk-i akhangbatem atema telangzüba agütsütsü melen tashiyim amshia pa hospital-i anir ao, ta metetdaksü.

Singh-isa, Wangchuk-i anogo aika lumia longkak aiter, ajisüaka Centre nungi shingaia pa ajurua mejembi, iba denji külemi police-i Jantar Mantar nung longkak aiterem dak tashiyim amshi, ta metetdaksü.

Baramati nung osangbenertem den jembidang NCP (SP) Tir, Sharad Pawar-i, "Centre-i iba tensa mazüokteter, aser ibaji ajanga kaketshirtem aika tarutsü jenjang raksatsür. Yimtenren party temi pa (Wangchuk) pusemdang sorkaribo kecha meinyaker. Congress, NCP (SP) aser party balala nungi lenirtem aikati longkak aitba tesem semdangogo," ta metetdaksü.

Ahmedabad nung firecracker factory ka apokba lendong nung nisung 8 asü

Ahmedabad, July 18

(Agencies): Honibarnü Ahmedabad yimti nung ozüing alema lapokba firecrackers factory ka nung langka apokba lendong nung nisung 8 asü aser nisung 10 dak tali yiruogo, ta police-i metetdaksü.

Joint Commissioner of Police, Jaipal Singh Rathore-i, "Firecrackers ji moapu ka nung yanglur. Iba lendong atalokba mapang nung iba tesem nungji mapa inyaker 12-15 shi liasü, ta mezüing bushisüngdang ajanga bushitetogo," ta metetdaksü.

Factory kiburji Mehul Dodiya lir ta police-i jangjaogo. Iba factory licence ji thinentfür liasü, ajisüaka parnoki ozüing alema maneni parnoki factory ji lapok.

Police-i, iba tatalokba dak sendakba nung Explosives Act kübok tapet arlra nung ajemdaker ken o benoktsü, ta metetdaksü.

Forensic Science Laboratory (FSL) aser bushisüngdangba

agency aika iba tesem jagi yoka lendong atalokba kuli bushisüngdangtsü tuyuogo.

Iba lendong atalokba osang angashia Ato kilonser Narendra Modi-i takoksa angur kibongtem den mangyim jashi lemsatep aser senotsü teyari agütsütsü sangdong.

Modi-i X ajanga, "Ahmedabad, Gujarat nung fireworks factory nung lendong ataloka nisung asüba osang angashia jashir. Iba ama mapang ka nung ni mangyimer kibongtem den mangyim jashi lemsateper," ta metetdaksü.

Paisa, local administration-i akokba tashi takoksa angurtem den yaritepdar, ta metetdaksü.

Modi-isa Prime Minister's National Relief Fund (PMNRF) nungi iba lendong nung asürtem kibong shia nem senotsü teyari lakh anana (lakh 2) aser yirua alir shia nem meyrjang tenem-nem (50,000) agütsütsü, ta sangdong.

Delhi Police-i Sonam Wangchuk kangshia hospital-i anir ao



New Delhi, July 18, 2026: Honibarnep Delhi police-i civilian süoshi semer Jantar Mantar nungi Sonam Wangchuk (teka mekanga alisang) hospital-i anir aodang tangokba noksa nung angur.

New Delhi, Chiteni/July 18

(Agencies): Climate activist, Sonam Wangchuk-i anogo 20 nübuba Jantar Mantar nung longkak aita aruba mapang Honibarnep Delhi police iba tesem jagi arua pa kangshia hospital-i anir ao.

Exam balala nung ochimashi aser question paper leak astiba atema Sonam Wangchuk-i Cockroach Janta Party pusema Union Education Minister, Dharmandra Pradhan dang menden nungi anentsü takhangba agüja lumia longkak aiter.

Cockroach Janta Party (CJP)-i tzüingluruwa mongpu Parliament senden tenzükba anogo (July 20) nung Parliament tashi longkak aita jajatsü sentong lir.

Wangchuk temang tamajungba akümba nung

ajemdaker Delhi police-i pa kangshia hospital-i anir ao. Osang angazükba agi, Delhi High Court tetuyuba nung police-i yamaji inyak.

Delhi police aika civilian süsohi semer aruba sülen Wangchuk-i memelungi pa hospital-i anir ao.

Deputy Commissioner of Police, Sachin Sharma-i, medical tetuyuba aser court tetuyuba nung ajemdaker pa hospital-i anir ao, ta metetdaksü.

Brihostibarnüa New Delhi nung court kati sorkar doctor tem dang anogo shia Wangchuk temang tendangtsü tuyua liasü.

Lawyer Rakesh Kumar Saini-i, Wangchuk-i maneni lumira pa taküm talangka malitsüa akok, ta shia court nem temepishiba ka agütsüba sülen

court-i, 'senso ajak takümüji senti' ta ashi.

Police-i Wangchuk hospital-i anir aoba sülen sorkar ketdangsertemi longkak aitba tesem nung security akhangshiogo.

Wangchuk kinüngtsü Gitanjali J Angmo-i X ajanga, "Ni hospital tonga ogo. Kü dang nungi temelaba magii mesüra ozü kibong aser tesüiba anogo 20 tashi pa temang repranger doctor tem dang nungi temelaba magii pa nem tebang ajanga mesüra ajem ajanga kecha magütsütsüla ta ni shiogo," ta metetdaksü.

Tamalen Wangchuk-i, pa süadok ka mesüra pai hopta asem lumia longkak aittsü, ta sangdonga liasü aser hopta asem majungdang police-i pa hospital-i anir ogo.

India aser Pak nungi ketdangsertemi arrtsülen security atema o lempet

New Delhi, July 18

(Agencies): Islamabad yimti nung India aser Pakistan na densema Shanghai Cooperation Organisation (SCO) züngsem linüktem nungi ketdangsertem senden mena International arrtsü nung security tensa atema jembiba den külemi amokmeren balala koktettsü atema amalitepa inyaktü asoshi o lempetogo.

SCO züngsem linüktem nungi Border Services of Competent Authorities nung tekolakpurtem sendenji Pakistan leniba nung amen, ta Pakistan Foreign Office-i sangdong ka ajanga

metetdaksü.

Iba senden nungji Belarus, China, India, Iran, Kazakhstan, Kyrgyzstan, Pakistan, Russia, Tajikistan aser Uzbekistan nungi ketdangsertem aser SCO Regional Anti-Terrorist Structure (RATS) Executive Committee nungi züngsemtem aden.

Iba senden nungji ketdangsertemi SCO züngsem linüktem nung aliba International arrtsütem nung tensa asadanga osangtsüsang lemsatepa liasü.

Parnokisa Joint Border Operation Solidarity-2025 kübok exercise agiba asadang. Parnokisa Joint Border

Operation Solidarity-2026 ayongzüka akatsü atema bangjem aser 2027 küm SCO kübok border service experts telok atema jembi.

Senden nungjisa Tajikistan nung Joint Border Operation Solidarity-2027 ayongzüka akatsü atema jembiogo.

Senden nung shilem agirtem ajaki, International arrtsü nung tayongzüka balala koktettsü atema osangtsüsang lemsatepba aser longjemer asalentong yangluba ajanga SCO züngsem linüktem tsüingda amalitepa tajungba akümba den külemi arrtsülen security tensa tajungba akümtsü, ta bangjemogo.



TIR YIMYIM YIMOBILEM (EDITORIAL)

DIMAPUR SUNDAY, JULY (CHITENI) 19, 2026

Tenünsang agütsüba

Khristan purtem atema taküm arishi aser nüngdakba rongsen ajak angudak lenmangji Tsüngrem nem tenünsang agütsüba ya ka lir. Alima nung alir takar aser tulurtema tenünsang angudang pelar aser peladangbo sensaker aser tilartem nem memeshidangyongi teyari tulu agütsür. Iba amaji asenoki Tsüngrem nem tenünsang agütsüdang Tsüngrema pelar aser kodang asenoki Tsüngrem peladaksüdir, asenoki memeshidangyongi Pai asenok moatsür. Khristan taküm ka atema jangratemtsüji ibaji asütsü. Asenoki sen teraka angutsü atema anogo piyong belemseta inyaker saka Tsüngrem nungi temoatsü angutsüabajibo melamelar kechiyong asenoki Pa nem tenünsang dang agütsü nung pai asenok moatsür. Tenünsang agütsüba mulungjangji Tsüngremi aginer. Tsüngremer temoatsüji anogo shia asenok inyaksangshiba nungi angur. Asenok shisabolua timtema alidang tembar, kiyonger mesüra kinünger kar nungi o tajung ka agi asenok mulung süneptsür, lenmang sayur aser teyari agütsür. Kenkenbo memetetba lenmang aser memetetba nisung nungi asenok teyari angur. Asenok aneper aser asenok mulung anisüngzüker. Item ajakji Tsüngrem nungi anguba temoatsütem alitsü. Kenü anogo zütsüra aketba nisung ter-i Yisu ajuru aser parnoki ola adoka Pa dang taneptsü taochi meshi. Idangji Yisui parnok dang parnoksa oa parnok temangji purtirtem dang sayutsü ashi. Anungji, parnoki tashi angaa putirtem dangi aoba mapang, len tom nung parnokji anepadok. Kodang parnok nisung ter rongnung kati pa dak zütsüra adoka aliba to anepogo ta metet, idangji pai Yisu tonga oagi Pa tsüngdang aputaka tenünsang agütsütsü bilemtet. Paji Samaria nunger ka liasü. Idangji, Yisui pa dang asüngdang, ni nenok ter aneptsü masü no? Tukubo kong ali? Iba bendanger nisung ka dak alaka Tsüngrem tenüng asangtsü meyipa arur shinga mali no? Iba otsü ya asenoki Luke tapu 17 nung shia angur. Yihuda nunger asoshi zütsüra tashidakji tesempatsü aser tashipangtsü tashidak ka liasü. Item zütsüra aketertem to pei yimtak aser pei kidang pei kinüngertem den alitsü mekoki aliba mapang ka parnoki Yisu ajuru aser parnoki meshiba ama parnok nem Yisui taneptsü taochi agütsü. Ajisüaka, Samaria nunger ka dak alaka par tukui parnok anepba asoshi Tsüngrem nem tenünsang agütsütsü mebilemtet mesüra mapang magütsütet südi. Parnok pei kinüngertem dena melitetsüsa aliba tashidak ka ajungbena ka anep nungji pelakanger parnok tukuprongla to Yisu alidak masü pei yim, pei ki aser pei kinüngertem ajurua matateti aritepa ao südi ta bilemer. Aiben asenok timtem aser nüngdak nung Tsüngrem dang meshia sarasademer. Iba amaji Tsüngremi asenok nem takok agütsür, jala jabaso moatsür, tashidak aneptsür. Alu nung metsü prokdang temoatsü meshia sarasademer proker saka alu rozükerbo Tsüngrem nem tenünsang agütsütsü amadoker. Tsüngrem dang mapa meshia sarasademer saka mapa ngurbo asenoki Tsüngrem amadoker. Paibo asenok moatsüogo, asenok aneptsüogo aser asenok nem takok agütsüogo saka asenokiang Pa nem tenünsang magütsüteter. Tenünsang ken 121 nung ashir, kü teyari ajak Tsüngrem nungi arur. Aji oda, kechisarina ajak nung asenoki Tsüngrem nem tenünsang agütsütsü mamali. Kodang asenoki Tsüngrem nem tenünsang agütsüdir, idangjiang ano asenok temoatsü tuluba angur. Filipi 4 nung ashir, kecha nunga temulung tadem, saka nenoki tenünsang agütsüba agi nenoki mepishiba Tsüngrem nem metetdakjang. Zütsüra aneptsür tukutobo kong lir ta asüngdangba ama, asenoka kong lir ta Yisui masüngdangtsüsa asenok mulungjang tenünsang agütsüba agi sünga alitsüabaji kanga tongtibang lir.

OLEMSABANG

Tsüngrem tenzüker ka taküm jaklaliru aser libaliru

~ L. Kika Pongener

Tanü putu nung asen lima nung Tsüngrem tenzükertem reprangdangra; tenzüker aika bendanga agütsüba tenzüker masü; saka tema tazütsü Tsüngrem tenzükertem angur. Tebang agibo Tsüngrem tenzüker ama jembir; saka mapa agipo Tsüngrem tenzüker ama lia mesayutetba Tsüngrem tenzüker aika lir. Tsüngrem o-bo kanga rah-a tsüngro songa jembir; saka libaliru, jaklaliru aser jembishinu yimya nungpo Tsüngrem tenzüker khenyongi memesuk aika lir. Tanü Tsüngrem tenzüker karibo arogo tsüzüng-özüng inyakyim tazüokba küpok melinur; pei sunutsü-sua dang tenzüknur. Tesasatsüka, Tsüngrem tenzüker aika pei ajangzüksüba aser sen nung dang rangloker tenzüka angur. Lim arogo aika nung toklang tenzükertem kati ka den putepa melitetba aser kati ka arishiba angur...!!! Tenzüker aikati pei tajangzüker aliba mapa nungpo temulung agüja, aser nendak-nendaka tenzüksü; saka pei ajangzüksü maliba mapa nungbo temulung magütsüi, zübazüema senzüka yutsüba mesura paizüka aoba angudang kanga sungmanger....!!! Yisu alima nung alidang, pai Yihuda nunger tesayur Farise aser tezülurtem dang yamai ashi...."Iba puri parnok tebang agi ni akümtsübur; saka parnok temulungjang ni nungi talangka pila-a lir" (Mathi-15:8). Atangji, tanü asen lima nung Tsüngrem tenzüker aika; Yihuda nunger Farise aser tezülurtemji mesuka....Tebang agibo Tsüngrem tenzüker ama jembir; saka mapa agipo Tsüngrem tenzüker ama lia mesayutetba angudang kanga sungmanger....!!!

Tanü asen lima nung lim arogo aika nung lanurtem tekülem sentepi arur mali kümogo. Aji oda, lanurtem tekülem sentepi arur malibaji lanurtem tejangraba mali asü (?) Mesura arogotem nung lanur Pastor-tem aser lennirtem tashimait asütsü (?)....ta bushidangtsüla. Tenzüker ajaki tangar tashimait indang mejembi-i; pei sasa pei tashimait khi bushidangtsüla. Ashiko, asen lenisuba nung tangar manidaktetsüsa aser manidaknutsüsa tashimait kar lira ibaji melenshitsüla. Tenzüker aika tanela nung khuret mabenba tenzükertem lir. Tenzüker aikati pei san-tem Tsüngrem o agi mesutsü aser kipoki tsüngdong yia Tanela nungdak peridaktsütsüba mapa zübazüba-a senzüka toktsür. Tenzüker aikati kodaser pei san-tem Tanela nung tashi-ita kümdaktsütsü aser tekülem sentepi jangra-a arudaktsütsü (?) Iba nukjidongji tuluba masü....Saka pei Ministry atema küm shia arogo-i sen (Budget) kwika lemzüksür (?) Ibaji dang tongtipangba (Priority) sudaktsüba tenzüker aika lir. Aji oda, Tsüngrem tenzüka mapa nung; teti dangpo aseni aginuba aser asen ajangzüksüba mapa masütsü akok....Mesura teti asen taginuba aser asen nukjidong ajakbo mataloktsü akok. Yongjia, nungloktsüba ajak nung nendak-nendaka aser bendanga agüja inyaksüla. Aji oda, Tsüngrem tenzüker aika sen amshitsü aser ajangzüksüba nung dang rangloker tenzüka angudang kanga sungmanger....!!!

Ano Tsüngrem tenzüker ajaki kanga junga angatetsüba tongtipang kaji....Pa/la kobala mapa nung adentsüla aser kobala mapa nungpo madentsüla (?) Ibaji kanga junga bendangteta meteta aliba tenzüker asütsüla. Tsüngrem tenzüker karbo pa/la adentsüla-madentsüla ajak nung kecha tebandang meli-i adenba; pa/la tebang yia jembitsüla-mejembitsüla ajak nung tebang jushia jembiba....Mapa ajak nung pa/la kibur sunuba Tsüngrem tenzüker karbo lir. Aji oda, Tsüngrem tenzüker kati pa/la adentsüla aser madentsüla ajak nung teka amuoka denra....Mapang kar nungpo tajangzüker dang nungipo tenungmenuk-ang tuluba ajurutsü....Ano aji dang masü kodang pa/la adentsüla/madentsüla ajak nung teka amuoka shilem agidir....Pa/la dak nubur aika mettsütaktsü. Tenyar Paul-i Rom nunger dangi züluba shiti nung yamai shia angur...."Osangtajung indang sayutsüngirtem tetsüngji koda tobur tajung" (Rom-10:15 b). Osangtajung indang sayutsüngirtemji Tsüngrem tenzükertem dang ajar ta angateter. Aji oda, Tsüngrem tenzükertem tetsüngji tobur tajung....Saka iba tobur tajung tetsüng jagi ajemoktsüla aser majemoktsüla; aotsüla aser maotsüla ajak nung oa ajemoka/dena jajara aser shilem agira....Mapang kar nungpo arr akettsü, arr menatsü aser tobur tajung tetsüngji tobur mejungi akümtsü. Anungji Tsüngrem tenzüker taküm kaji kanga dang azüoka aser kümdanga tenzüksüla. Tsüngrem tenzüker kati koba mapa nung adentsü aser koba nungpo madentsü (?) Ibaji kanga junga bendangteta aser meteta tenzüksüla. Lishitsüng nung ajemoka jajara kanga kümdanga jajayongjia lishi tilakabosa teploktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Harvest Crusade nung nisung 4,200-i Yisu Khrista agizük



July 11, 2026 aonung California nung aliba Angel Stadium nung ayongzükba Harvest Crusade nung adenertem noksa nung angur.

July 18, 2026: America linük nüchiso anguba sülen küm 250 ajungba nüngtem nung July 11, 2026 nü ayongzüka agiba Harvest Crusade nung nisung meyrjng aikati Khrista agizük. Küm shia Harvest Ministries-i Harvest Crusade ayongzüka agir. July 11 aonung Harvest Crusade nung tekülem agi, sarasadem, Khrista osangtajung lemsatepa liasü aser Tsüngremi mapa tulu inyak. Sentong tembangba tashi nungbo nisung 4,200 dak temai Yisu Khrista agizük. 1990 küm nungi tenzüka tanü tashi Harvest Crusades ayongzüka agiba sentongtem nung nisung meyrjang aikati Yisu Khrista agizükogo. July 11 nü California nung aliba Angel Stadium nung ayongzükba Harvest Crusade nungji nisung 30,000 dak tali aden aser nisung 250,000 dak tali online ajanga aden. Iba sentong nung Arogo 172

nungi züngsemtemi shilem agi, volunteers 3,000 liasü aser nisung 4200-i Khrista agizük. Taküm Harvest Crusade sentong tenzüka wako asongba sülen taoba mapang Vietnam rara nung shilem agir aser pastor, Raul Ries-i sarasadema iba sentong tenzük. Iba sentong nung adenertem nem America nunger mezüng tamangertem indang nenshia metetdaksüba den külemi Yisu Khrista ajanga dang chichiba nüchiso angutsü, ta ashi. Iba sentong nung Khrista osangtajung kentenertem- Phil Wickham, Michael W. Smith, Kari Jobe Carnes, Cody Carnes aser TAYA nunger leniba nung tekülem aser tetushi agia liasü. Loktii 'Waymaker' aser 'What an Awesome God' ken na densema ken aika aten. Tsüngrem O jembidang pastor Greg Laurie-i "Na süadokba sülen minute ka tsüngda kechi ataloker?" ta asüba onük jembia liasü.

Pastor Greg Laurie-i tatem maka taküm, tai atokba aser Yisu Khrista nungi anguba teimla osang lemsatepa liasü. "Ibayongji tanü asenok yangi lir. Tesüiba küm 30 dak tali Harvest Crusade ajanga osang ka dang sangdonger, aser iba osangji ya lir: Yisu Khrista kangki nung asü, tasü nungi shia aru aser Pai Pa matsüngdangi arur ajak nem tatok agütsür, teimla agütsür aser taküm tasen agütsür," ta pai metetdaksü. Tesüsa Pastor Greg-i Khrista dangi arutsü tayongzükba agütsüba mapang nisung meyrjang aika sabangleni arua liasü. Hopta ana tejaklen California kübok Newport Beach nung nisung meyrjang aikati longkak aita tensa mejungi raksaa liasü, ajisüaka kobi melii Newport Beach nung nisung meyrjang aika adenshitsü aser Tsüngrem külemtsü sentong lir. Ano külen 1960s tatembanglen aser 1970s

China kübok Hunan province nung house church aika mita ao

July 18, 2026: China kübok Hunan province nung police-i house church aika mita aoba mapang nung Khristan lenirtem aika apu, ta Khristan melungtet telok, ChinaAid-i metetdaksü. July 11, 2026 nü Hunan province kübok Yueyang nung house churches mita aoba mapang nung apuba Khristantem aika chiokogo, ajisüaka pastor tem aser Arogo nung inyakertem trokbo tang tashi mechiok. Tang tashi police ket nung alirtemji Pastor Huang Lei, Arogo nung lenir Yang Jianjun, sayutsüngir Hu Hongtao, Pastor Luo Kaimin, Sister Yang Chun aser Brother Fu nunger lir. Khristantemi ashiba agi, police-i Khristantem dang mapang talangka

asüngdangya, fingerprint agizüka ayu, DNA sampling atema azü tuzük, ola aser video record asü aser nija dak sendakba osang tejangja benden. Khristan tetsür katibo police-i bank information dak sendakba sangdong ka azüngtsü memelungi liasü; tesüsa la dang phone number meshiba sülen chiok. Ano Khristan tetsür kabo tenük majungba agi police-i agütsüba sangdongji mezüngtet, anungji la dang sarasademang ta ashiba sülen sarasademba olaji record süa ayu, iba sülen ang la chioka liasü. Pastor Huang Lei kinüngtsü Wang Ling-i, police-i lar ki mita aruba mapang nung Laishiba aser Khristan kaket ajak rakzüka bener ao, ta metetdaksü.

R e s h i k a n g s h i ajangshiba China nunger Khristantem yariba telok, ChinaAid tentetsang aser Tir, Dr Bob Fu-i, China nung sorkar den register masüba underground Arogotem maneni mita aoer, ta metetdaksü. Fu-i, "July 11 nü Yueyang nung house churches mita aobaji ajanga Xi Jinping leniba kübok Chinese Communist Party (CCP)-i maneni asalentong yanglur independent house churches samatsütsü atema inyakba kuli sayur," ta ashi. C h i n a A i d - i s a , Laishiba rakzüka ayuba, biometric data bendenba aser Khristantem anema maneni inyakba ya yimsü temeden atema tenokdangba tesashiba benokba lir, ta ashi.

tetenzüklen America nung liasü," ta ashi. 'Jesus Movement' aliba sülen Kasa sentong nung adener 2023 küm nungi tenzüka Suzie-i, "Nisung ajaki longjemmer Harvest Ministries-i item ama Yisu tenüngsanga ken atenbaji sentong aser outreach sentong jangratemtsüka liasü. Atem-a balala ayongzüka agidang nisung ajak anokshia liasü," ta ashi. 10,000 dak tali baptiogo. Lisa-i, "Nisung aika Yaküm August 16 nü sabangleni aoba ngua ni Harvest Christian Fellowship-i asükshijang meronga liasü. Newport Beach, California Lanurtem-a aika liasü. nung aliba Pirate's Cove nung Asentenshi mapang ka liasü. 3buba Annual Jesus Revolution Iba ama tesüngmangtsü sentong Baptism ayongzüka liasü, aser ayongzükba atema Pastor Greg iba sentong nungji Pastor Greg aser Harvest ministry moatsür," Laurie-i nisung 2,100 baptitsü. ta metetdaksü. Iba sentongji yaküm Angel Harvest Crusades atema Stadium nung Harvest Crusade tenla agütsürtem aser Harvest agiba sülen ayongzüka liasü. Partners ajanga küm shia Tawa Harvest Crusade nung Harvest Crusades ya adener kati social media ajanga, ayongzüka agiteter, anungji "Kibuba Yisu Khrista nem maneni Harvest Ministries sentsüwangshi ajak agütsür. atema sarasademjang, Nisung aika den külemi adenshir kechiyong nai yaritepba ajanga T s ü n g r e m alima tesem balala nung nisung sentsüwangshidaksüba ya ni meyrjang aikati Khrista asoshi jangratemtsüka liasü. Nai osangtajung angashitsü atema teka songlar Tanela Temeshi maongka angutsü, ta Harvest den salemtettsüsa mapang ka Ministries-i metetdaksü.

ANO GO ABEN TSÜNGREM DEN

TEMENEN NUNGI KÜMZÜKDI

MERANGA INYAKBA NUNGI TEMOATSÜ

"Ajungben anguba rongsenji ajema akümstsü; saka züsenba agi terara shibai bendendir, pai züintsü" A.Shin 13:11

Tsüngrem o nung shia aliba ama, shirnoki alima mapa nung ochi mashir parnoki tatem nung tamakok tulu ajurutsü.

Tanü asen lima nunga nisung aikadi mapa meinyaki dang ajungben katetba asenoki angutsü, saka repranga ali nung parnokji tatem nung tamakok nung atemer. Government, private, loktitem mesüra arogotem nung, shibai aser shirnoki kechi mapa inyaktsü nungloktsü, item mapatemji meinyaki tiyazü nung bill yanglua agizükbaji Tsüngrem nungi atakatem angutsüsa. Mesüra nisung kar ashiokja rongsen bendenba, mesüra election mapang candidate-temi sen alemba agizüka agiba, mesüra ashikülak agi miimzüka sen bendenba item ajak ya ochi mashiba rongsen bendenba lir.

Item ajungben anguba, bendenba rongsen yagi pei taküm, kibong nem kecha tajangzük magütsütsü saka pei taküm, kibong asoshi timtem, takoksaba, lendong ang bendenlokba asütsü. Ochi mashiba rongsen jagi asenok kodanga takar makümstsü, temoatsü kodanga züina malitsü saka iba ochi mashiba rongsen jagi kenübo asenok laodaktsütsü aser iba laobajibo tulu aser maaksü alitsü.

Tsüngremi asenok dang teti ajungshibaji, asenoki meranga inyakba nung züsentetba nung teti azükaru, temoatsü alitsü.

Asen asentzüji Tsüngremi aginür kechiaser Tsüngrem asenok iba limai yokbaji meranga inyakba taküm kaka asütsü yokba lir aser iba nükjidong ya shibai angateta iba lima nung lidir parnok Tsüngremer takokba kurangji ajangzüktsü.

SARASADEM:

Kibuba Yisu, ochi tashi, tanela nung pei nem lemozüktsüba mapa shitak inyaktsü tashi moajangma. Amen

PELABA LEMSATEPER

Onoki teti meima aliba
Asür IMTIMAR Ao
(Chuchuyimlang) JULY 15, 2026
anogo nung akumli wadang
tembangba asoshi kinungertem
mangyima aliba mapang ana aser
talang nungi shirnokisa nübu,
rongsen aser sarasadem
agi ozu kinungertem den
yaritepogo nenok ajak dang
pelaba lemsateper.

Nenoki onok asoshi mapa tajung
inyakba atema asen tulusang
Tsüngremi nenok ajak moatsütsü
ta ozu tamang sarasadem.

Temeim kinungertem



LT. IMTIMAR AO
15.03.1968 - 15.07.2026

GOVERNMENT OF NAGALAND
DIRECTORATE OF TECHNICAL EDUCATION
NAGALAND: KOHIMA

Dated, Kohima, the th July, 2026

NOTIFICATION

NO.DTE/ESTT-2/NEET/02/2026/In continuation of this office Notification No. dated 16thJune 2026, the last date for submission of NEET (UG)-2026 application form along with the NEET score card has been extended till 23rdJuly 2026 (Thursday)4:00 PM.

Further,no application shall be accepted/entertainedthereafter.

Sd/-
(Er. VIPULHOU LHOUNGU)
Director.

Iran-i maneni Gulf state tem nung US tamendakdak balala amak

Dubai, Chiteni/July 18 (Agencies): US-i aonung tenetbuba atonga Iran indang military tamendakdak balala amakba sülen Iran-ia Honibarnü Gulf nung US den sendaktepa aliba linüktem makogo. Ceasefire atema nangzüktepba chirepba sülen linük ana asendenshir raratep tenzüko.

Kuwait nung desalination plant ka dak kongshiogo aser missile aser drone tem agi amokmerenba ajanga Kuwait International Airport nung inyangsangshi anena liasü.

Iran indang Revolutionary Guards-i ashiba agi, parnoki Camp Arifjan nung U.S. military support centre ka amak aser Kuwait kübok Ali Al Salem Air Base nung radar facility ka raksatsüogo.

Iranian state media sangdong ka ajanga ashiba agi, Bahrain nung Revolutionary Guards-i US indang rara dang amshiba tayimtsü yua aliba Sheikh Isa Air Base aser intelligence data centre ka maka liasü.

"US military inyakyim nokdangtsü atema international riju kecha mali asünung onok asoshi tanga lenmang kecha mali saka Quran-i kechi tetuyuba agütsür iba sülen anidaktsüba dang. Shirnoki nenok makdir nenokia kasaji makang," ta Revolutionary Guards-i ashiba den parnok temeket nung US den sendaktepa aliba linüktem dang renema alitsü atema tekümdangtsü metetdaksüogo.

Hokolbarnü telok anapronglai rong senzusenpong dak rangloker jenjang agi aser US-i ashiba agi, parnoki rong senzusenpong nung tenokdangba ka agütsüogo. Kasa mapang nung Iran-ia Strait of Hormuz nung temzüng ozüng sülen manidakba rongtem anema jenjang agiogo.

Hokolbarnü totzü jenjang shilem 4 agi timba kümogo, aser iba ajanga US tir Donald Trump tali nongshidar. Pai aniba Republican Party pur November ita congressional elections nung takok angutsü merangba mapang tang parnok kanga nongshia arudar.


Ceasefire atema tenangzüktepba taoba hopta chirepba sülen Washington aser Tehran na kati ka tendangtepa arudar aser maneni rara tulu adoktsü ana nung lir.

Rara mapang aibelen menatsü ana nung liaka tesem balala amakba mapang civilian infrastructure tem dak kongshia arudar.

Iran media sangdong balala ajanga ashiba agi, Honibarnü Jask yimti nung missile tem aikati ?power facility aser desalination pump tem dak kongshiogo. Yimtsüng 20 shi nung nisung 10,000 shi tzü maka kümogo, ta Tasnim news agency sangdong ka ajanga metetdaksü.

Iran-i Kuwait amakba mapang power generation ka aser water desalination plant ka dak kongshiogo, ta linük Electricity, Water and Renewable Energy Ministry-i sangdong ka ajanga metetdaksü. Anogo ana tsüngda tang agi tanabenbuba Kuwait nung tzü asüngtetba tesemtem makogo.

Kasa mapang nung U.S. military indang Central Command-i



Hau ni tasü ammag ayongküm ajanga jaja-aka ni kecha metsübutsu, kechiaser na kü den lir.
"Pa jogo asenok den mali ta meshili, saka tepela aser tenügsang agi pai junga litetogo ta.
Tsüngrem tenüng sanga shiti."
Rev S Nukshinuken, Pastor (1912-1976)
Tsüngremi anir oer küm 50 abensaba anogo tanü 19th July 2026.
Chirnurtem, semchisemnurtem, anükapang aser sosemtangsem kinungertem ajaki Tsüngrem tenüng sanga bilemteter.

Israel army-i southern Lebanon nung school asem raksatsü: minister

Beirut, Chiteni/July 18 (Agencies): Israel military-i southern Lebanon nung osettsütem ayuba sülen school asem raksatsüogo, ta linük education minister-i ashi.

Israel-i school tem nungi oset balala ayuba sülen bomb amshia item school tem awi kümdaktsüogo, ta Education and Higher Education Minister Rima Karami-i ashiba Lebanon indang state-run National News Agency (NNA) sangdong ka ajanga metetdaksü.

Rara mapang riju balala raksaba rongnung tang item school tem ya bendenlokogo, ta Karami-i ashi.

2023 küm October ita nungi Israel-i Gaza amak tenzükba sülen Israel aser Hezbollah na ita aika arrtsü adena kati ka maktepba aruba ya March ita Lebanon nung rara tulu ka aküm. Israel-i ashiba agi, parnoki Hezbollah pur amaker.

United Nations Educational, Scientific and Cultural Organization (UNESCO)-i June ita ashiba agi, Lebanon nung school 17 ajarepogo aser school 100 dak tema raksago. Tang school asem raksaba sülen ajak senteper school 20 jungogo.

Rara pokteter aliba ajanga Lebanon nung tanur 500,000 shi school-i moteti lir, ta UNESCO-i ashiba den, shisaluyim nung mapang talangka minprongba ajanga tanurtem renloka aoba nung tetsüdaktsü adoktsü ta tekümdangtsü metetdaksü.

Rara mapang school tem kümzüka ayutsü atema alima kintem bendanga agütsür liaka Lebanon nung school aser education system raksaba ya alima



Higher Education Minister Rima Karami

ajunga nükdang atalokdar, ta Karami-i ashi.

Lai linüktem dang, shisaluyimda riju balala amakba anendaktsütsü aser military operation tem nungi school tem kümzüka toktsütsü atema Israel nongshitsü asoshi ayongzüko.

Lebanon nunger ketdangsürtemi ashiba agi, Israel-i March ita nungi linük amak tenzükba sülen nisung 4,324 tepsetogo aser 12,223 yirutsüba den nisung million aika pei talidak toktsür aotsüsa kümogo. Asürtem rongnung tanur 250 densema lir.

US teyongtsüi ia Lebanon aser Israel nati June 26 nü tenangzüktepba ka yangluogo, aser iba ajanga Israel nunger sepaitem shilem balala küma lemsar Lebanon nungi atsüngintsü asoshi lenmang lapoktsüogo, ajisüak parnok koba mapang tashi nung atsüngintsüla iba indang shia mali, saka Hezbollah puri koba mapang tashi nung prangbong hadirtem toktsüdir iba dak keta lir ta dang shiogo.

UN Development Programme (UNDP)-i, southern Lebanon nung ki 11,000 dak tema raksago, ta metetdaksü.

Taküm World Cup shibangba sentong nung live performance anaalitsü



Justin Bieber, Shakira & Robbie Williams

Chiteni/July 18, 2026

(Agencies): 2026 World Cup final nung live performance ana tashi alitsü; ka asaya metenzükdang aser ka half-time nung agitsü renema lir.

New Jersey kübok MetLife Stadium nung July 19 nü final asaya ayongzüka asayatsü lir, aser asayamung shibangba sentong nung alima nung nüngtugu artist kari shilem agitsü renemdar.

World Cup shibangba sentong ya 6:30 Pm BTS nung

tenzüktsü. Final asaya metenzük tsüingda Jennifer Hudson-i United States national anthem, 'The Star-Spangled Banner' atentsü.

Taküm asayamung agitsüpurtem rongnung Tom Cruise, iShowSpeed, Post Malone, Robbie Williams, Nicole Scherzinger, Laura Pausini, Chris Martin, Justin Bieber, Madonna, Shakira, Gustavo Dudamel, BTS nung densema lir.

Taküm final asaya ya Spain aser Argentina na asayatsü lir. Semifinal nung Spain-i France tsükdaktsü aser Argentina-i England tsükdakja liasü.

Kasa mapang nung Forbes sangdong ka ajanga ashiba agi, FIFA World Cup 2026 final ya US sporting event tem ajak rongnung sen tasaktiba asaya ka asütsü.

Osang ajanga ashiba agi, final reprangtsü atema ticket senji USD 6,943 asütsü. Ajisüaka TickPick-i ashiba agi, final atema ticket sen USD 11,327 asütsü, koba US nung asaya ka reprangtsü atema sen entokba rongnung timtiba asütsü.

Ticket ajak dang tasaktibaji Metlife Stadium nung Section 115A atema asütsü, koba USD 28,479 agiang alitetsü.

US nung sen tasaktiba agi ticket alia reprangba asayaji 2024 küm San Francisco 49ers aser Kansas City Chiefs (9,411 dollars) na Super Bowl asayaba ya asütsü. Iba mapang ticket sen 9,411 liasü.

Villa-i £50m agi Manzambi alizükogo



Johan Manzambi

Chiteni/July 18, 2026

(Agencies): Aston Villa-i Freiburg nungi midfielder Johan Manzambi pound million 50 dak tema agi alizükogo, koba club-i sen tasaktiba agi asayar ka alizükba otsü tasen ka asütsü.

Switzerland nunger international asayar atema pound million 50 dak tema agütsüba ya Villa-i küm ana tejakdang Amadou Onana atema Everton nem pound million 50 agütsüba dang nungi timba kümogo.

Villa pur ano Wolves midfielder Joao Gomes pound million 38 agi alizüktsü ana nung lir, shiba medical tetendangba agitsü atema Portugal nung iba Championship club indang training camp toktsüogo.

Manzambi ya taoba hopta Newcastle nung tera agi dang maden, saka Villa-i yakta dang jenjang agi aser pai-a iba club nungang dennüa liasü.

Switzerland pur taküm

World Cup nung quarter finals tonga asayaba mapang arishi küm 20 tain asayar yagi goal 3 idaktsüogo.

Pa May ita Istanbul nung Europa League final nung Villa den Freiburg nungi asayaogo. Iba asaya ya Unai Emery-i aniba team yagi goal 3-0 agi koka liasü.

Manzambi nem Europa League Young Player of the Season naroküm agütsü, shibai taoba season asaya 47 nung goal tenet idaktsüogo. Freiburg pur German Bundesliga nung tenetbuba nung tembanga liasü.

Youri Tielemans Manchester United dang pound million 35 agi ayokba sülen Villa pur midfield nung asayar nüngdaka aliba mapang pa tang iba club nung denogo.

Villa pur ano taruba küm tashi Onana nübu magishitsü, shiba World Cup nung temekok kanga mejungi yiruoogo.

PV Sindhu Japan Open 2026 Final-i iogo



PV Sindhu

Chiteni/July 18, 2026

(Agencies): Japan Open tetsür kija semifinal asaya nung China tsür Chen Yufei hamstring yiruba ajanga tanabuba game tom nung asaya nungi anentsüsa akümiba sülen PV Sindhu final-i iogo.

Sindhu tang iba asayamung final nung mezüngbuba asayatsü lir, aser la mapang talangka BWF Tour nung final metongteti aliba tongtetogo.

Sindhu-i iba asaya 21-19, 15-10 agi koka liasü. India tsürla ya Deobarnü final nung Akane Yamaguchi mesüra Putri Kusuma Wardani den asayatsü.

Quarterfinals nung walk-over ka ngua kanga junga anisüngzüka sülen Sindhu semi-final-i ai aser lai tetenzük nungi attack süa asaya aser rally tem aziüoka asaya-a Yufei indang defence kanga junga raksaja liasü.

Asaya ya China tsürla yagi tajungba tenzük aser la tejakdang liasü, saka Sindhu-i telangzüba tajung agüja point pongu atonga angu aser la 10-5 agi tejakdang aküm. Break sülena Sindhu-i maneni attack süa asaya.

Break sülen asayar ana tali toktepba asaya aser iba mapang

rally talanglang asayaba nguogo. Sindhu-i la indang cross-court drop shots kanga junga amshia asaya aser point tem nguteta maneni la tejakdang aküm. Ajisüaka Yufei-i metoktsüi toktepa asaya-a Sindhu menepa atu.

Tena tsüingda mapang ka nungbo shot 51 tashi rally ka asaya, koba tatem nung Sindhu-i koka liasü. Asaya anapronglai point 19-19 anguba sülen kanga dang tongtibang mapang ka nung Sindhu-i aibelen memenai asaya-a mezüngbuba game akok.

Tanabuba game-a mezüngbuba game den kasa shi dang liasü, aser break tashi nung 11-7 agi Sindhu tejakdang aküm. Iba mapang tashi nungbo Yufei temang nung timtem adokatoker liasü aser hamstring agi timtem agütsüba ajanga asayatsü mejungi anena Sindhu nem takok agütsü.

Sindhu-i iba asayamung nung kanga junga asaya arudar aser lai world No. 5 Han Yue dena kokogo.



Commonwealth Games nung gold medal ana ngur alila Mirabai Chanu aser Tokyo Olympics bronze medallist Lovlina Borgohain na CWG lapokba sentong nung India team wako aser baton abener asütsü. Taküm Commonwealth Games ya Glasgow, Scotland kübok OVO Hydro nung July 23 nü nungi tenzüka asayatsü.

Match-fixing aser sübokrem atema Manjot puogo

Chiteni/July 18, 2026

(Agencies): Lanka Premier League (LPL) 2026 tenzüktsü lia taoba mapang India U-19 team nungi asayar Manjot Kalra, asayartem nem sübokrem agütsütsü merangba atema Sri Lanka nunger ketdangsürtemi puogo.

Kalra ya Shubman Gill aser Prithvi Shaw nunger den külemi asaya liasü aser pa ya LPL nung Jaffna Kings franchise indang co-owner lir.

Manjot Kalra ya Colombo nung five-star hotel ka nungi Prevention of Offences Relating to Sports dak sendakba nung Police Special Investigation Unit (SIU)-i apu. SIU Inspector Supun Vidanage-i ashiba agi, Kalra-i asayar ka nem Sri Lankan rupees lakh 95 agütsütsü renemer liasü.

Asayar yagi Kalra ochi mashi inyakyim indang ketdangsürtem nem asayamung metenzük tsüingda anogo ter jelia metetdaksüba sülen bushisüingdang tenzüka liasü.

Iba ajanga bushisüingdangertem nem pa mapu tsüingda tensa kanga junga asadangtsü asoshi maongka agütsü.

Manjot Kalra indang club nungi asayartemi pa anema tashishiba agütsüba sülen pa puogo. Jaffna Kings squad nungi Sri Lanka nunger asayar Bhanuka Rajapaksa, Avishka Fernando, aser Dunith Wellalage nungeri sübokrem aser match fixing atema parnok den tongtepratepba indang tashishiba agüja liasü.

2019 küm ICC U19 World Cup final nung century ka azükba sülen Manjot Kalra ya ajaki jangja aküm. Australia den asaya nung pai run 102 yanglua India-i iba asayamung akokba nung teyari agütsü.

Taküm küm tetenzüklen pa ya sports investor ka aküm aser LPL-i ia liasü. Jaffna Kings ya Kalra aser India nunger entrepreneur Mayank Goel nati aniba Sports Commune, sports management firm meyang lir.

BILEMDANGANG**"Aibelen ajanga nai merangdangba sayur."**